



## Upendo wa Mungu Unaoneshwa katika Uumbaji

**K**wa kuwa katika yeye vitu vyote viliumbwa, vilivyo mbinguni na vilivyo juu ya nchi, vinavyoonekana na visivyooonekana; ikiwa ni vitu vya enzi, au usultani, au enzi, au mamlaka; vitu vyote viliumbwa kwa njia yake, na kwa ajili yake. — **Wakolosai 1:16.**

“Mungu ni upendo” (1 Yoh. 4:16). Asili Yake, sheria Yake, ni upendo... Kila dhahirisho la uwezo wa uumbaji ni dhahirisho la upendo usio kifani. Ukuu wa Mungu unahusisha ujazo mkamilifu wa baraka kwa viumbe wote...

Historia ya pambano kuu kati ya wema na uovu, tangu wakati lilipoanza mbinguni hadi kutupwa kwa mwisho kwa uasi na kuondolewa kikamilifu kwa dhambi, pia ni onesho la upendo wa Mungu usiobadilika.

Mwenye Enzi Kuu ya Ulimwengu hakuwa peke yake katika kazi Yake ya wema. Alikuwa na mshirika—mtendakazi mwenzake ambaye angeweza kuthamini makusudio Yake, na angeweza kushiriki furaha Yake katika kutoa furaha kwa viumbe. Hapo mwanzo kulikuwako Neno, naye Neno alikuwako kwa Mungu, naye Neno alikuwa Mungu. Huyu mwanzo alikuwako kwa Mungu” (Yohana 1:1, 2). Kristo, Neno, Mwana pekee wa Mungu, alikuwa mmoja pamoja na Baba wa milele—mmoja katika asili, katika tabia, katika kusudi—nafsi pekee ambayo ingeweza kuingia katika mashauri na makusudio yote ya Mungu. “Naye ataitwa jina lake, Mshauri wa ajabu, Mungu mwenye nguvu, Baba wa milele, Mfalme wa amani.” (Isaya 9:6)...

Baba alifanya kazi kupitia Mwanawe katika uumbaji wa viumbe wote wa mbinguni. “Kwa kuwa katika yeye vitu vyote viliumbwa, ...ikiwa ni vitu vya enzi, au usultani, au enzi, au mamlaka; vitu vyote viliumbwa kwa njia yake, na kwa ajili yake” (Wakolosai 1:16). Malaika ni watumishi wa Mungu, wanaong’ara kwa nuru inayodumu kutiririka kutoka katika kuwepo Kwake na wakipaa na kwenda kasi ili kutekeleza mapenzi Yake. Lakini Mwana, mtiwa mafuta wa Mungu, “chapa ya nafsi yake,” “mng’ao wa utukufu Wake,” “akivichukua vyote kwa amri ya uweza wake,” Yeye anayo mamlaka ya juu kabisa kuliko hivyo vyote (Waebrania 1:3)....

Kanuni ya upendo ikiwa ndiyo msingi wa serikali ya Mungu, furaha ya viumbe vyote vyenye ufahamu inategemea kupatana kwao kikamilifu na kanuni zake kuu za haki. Shauku ya Mungu kutoka kwa viumbe Wake wote ni huduma ya upendo – huduma inayotokea katika kuthamini tabia Yake. Yeye hafurahii kabisa utii uliolazimishwa; na kwa wote huwapatia uhuru wa nia, ili waweze kumpatia utumishi wa hiari.

Kadiri viumbe vyote vilivyounbwa vilivyokiri utii wa upendo, kulikuwa na upatanifu mkamilifu katika ulimwengu wote wa Mungu. Ilikuwa ni furaha ya jeshi la mbinguni kukamilisha kusudio la Muumba wao. Walipendezewa na kuakisi utukufu Wake na kuonesha sifa Zake. Na wakati upendo kwa Mungu lilikuwa ndilo jambo la juu kabisa, upendo wa kila mmoja kwa mwingine ulikuwa wa kweli na usio na ubinafsi. Hapakuwa hata na noti moja ya sauti isiyo na ulinganifu iliyoharibu upatanifu wa kimbingu (Patriarchs and Prophets, 33-35).